

湘綺樓日記

湘綺樓日記

光緒九年癸未

九年癸未歲正月癸未朔晴元日光霽湖南所僅見以窗燈掩明少寐俄覺則日出矣工人尙未開門亦人家所僅見從後房入正室孺人未覺坐待家人滌除設香案祀

三祀畢分年餠飲果茗登樓試筆屋霜猶積重閱樊敏碑云遺苗后稷社漆從岐曾郎新說自土沮漆爲后稷時地望此可爲證然柳碑僞也金石錄載之其文乃絕似余所作無漢人疏拙之美又以庚真同叶謬學離騷皆作僞之驗假若真漢碑則余文固當過之午晴路乾將出而紉女相隨不已因步從又一村繞舊湖隄而還楊兒來賀歲重伯與可莊來談以其喪不言及年事甚爲知禮芝生夜來辭行有雨

二日雨元日喜神在東南今日仍向東南行自街東至學院街還向東循

瀏陽小鳥高升三門還門賀者十八家入者勞胡黃熊四家耳熊與蔡新吾同宅蔡妻尙存留片問訊聞其長孫甚游蕩至家孫涵若正在客坐入見留談諸女鬪牌至且其母坐觀不倦猶有童心也

三日陰國忌不出客來者不絕唯蓬海子勛排門入得見熊鶴翁送詩來省城能詩人甚多鶴翁乃歎無詩人相需殷而相遇疏此與今患無才者正同因作一詩和之並如其意示重伯

四日陰晴出從西北行自黃竹過笛仙度湘春朝宗驛步小西醴陵由又一村還謝客四十五家唯笛仙及四母重伯處入見黃親家處入而未見申正還與胡尙志相遇於門尙志入久坐璫愔過窻家懿兒始入學令功兒釋菜送學余爲之師授爾正唐詩臆緹設饌款余特重其事異於諸子女諸子女皆釋奠余爲之主不設賓主也逸梧問典故四條皆習見而不能舉其所始者

五日陰雨早起作詞一首

夏芝峯歲有探梅之約每以人日載酒定王臺
余前有白石詞及詩今歲更於六日招飲因

用草窗春游調先成一闋探梅信看乍入新年東風相趁喜詞人依
舊韶光豔華髮幾年人日尋芳約春早佳期近更多情逗酒迎香鬪詩

催韻紅綻北枝認似漢月鏡擔湘煙長暈雪麓臺前游展沒
苦豐登臨共道遊頭好花與人俱俊料今年先占一分春穩 午授懿

書夜與妻妾打牌二婦兩女排日供饌今夕盼上食寢緹忽若不歡食

畢遂散

六日陰懿兒課畢攜紉女出補賀六家遂至定王臺夏糧儲約探梅未至

徧游而還唯樓瑣未得上耳窻女回拜年女客亦有至者食湯餅小坐

仍往定王臺主人陳丹階先至少村昀谷青餘繼至挈榼班肴殊甚草

草唯梨鴨尙可耳初更各還家人門牌余獨臥至二更後乃起解衣

人日陰雨獨居無事作龍芝生妻墓表一篇未成姚立雲王逸梧來晚過

芝生詢其妻年狀入門乃聞其子殤草草見談濟生驗郎皆出以攜紉

女不可夜坐遂還

八日陰青餘來羅春山之子慶章來懿兒讀未畢而日暮矣膠緹出賀年亦攜紉出輿病增腫令功兒率就醫視之凌善人來

九日陰黼堂黃介夫婁麗生來出答訪善人因過王老虎胡尙志皆不遇遂往筠仙家春酒濟生逸悟任周編修皆先在設饌殊不旨多談鹽務頗及當道長短余微言養望之意引富不可求爲證與筠意忤未知其能悔悟否筠不徇俗乃欲以子久主校經宜其授人柄也輿左手大腫不識何證經五醫未有知其所以然者

十日陰比日試鈔考工記殊不成課今始仍復舊程笛仙來瞿子純來膠緹出過陳妹家紉從欲出未果

十一日陰雨鈔考工記改繪事後素之注以素功爲獻素功驗之乃後施采一防婦官行濫一防畫工換易於此爲有益若後畫白色不待言也若謂先有素而後有畫更迂拙矣

十二日陰雨出答訪盧麗生過子久一吾處談紳士鄉官有異士必通籍
京朝乃可爲紳鄉官則陳湜周樂輩足當之矣看鈔報 太后病大愈
醫生授官亦國史中一段故事過劉馨室不遇而還

十三日陰雨雨珊梁三唐壽嵩王純甫均自鄉間來女客亦多門庭擁塞
鈔考工半葉多誤故罷

十四日陰雨將出答客以國忌不可廖總兵來鈔考工一葉瞿子玖歐陽
接吾來作龍熊氏墓表成

十五日雨晨起詣純甫廖清亭雨珊均不遇卽還家中饌具作粉團待夕
祠司命竈井拜

祖廟賀元宵雪子間作夜寒殊甚羅嬰三弟均來過節家人並鬥牌爲戲
至四更無月無鐙城中寂寥雖人事蕭條亦天色使然得嚴生蜀中書
十六日雨諸女入學輿兒猶未愈督課略示程序耳鈔考工一葉午出瀏

陽課題答訪接吾不遇欲詣雨珊從蓬海門過正見轎入本約申集因
入視之則盧麗生姚立雲俞鶴皋皆已至看金剛訴冤書久之乃入坐
戊正散

十七日昨夜大雪比起時已銷矣瓦溝尙積寸餘登樓少坐卽下午出詣
筠仙雪又大作再過雨珊不遇至傅青餘宅陪夏糧儲吳昉谷陶少雲
任雨田飲於澹園胡氏後居也正見定王臺初不知誰氏之廬蓋城中
最新第宅亦近市聲肴菜唯釀金橘尙新申集戊散雜談頗久夜始復
寢

十八日雪令諸女轉鈔唐詩舊選絕句無頭腦自補選之未數行左郎來
請陪客功兒已晨往茲復來請恐有要客卽往拜柩以今年初至其家
也陪客周熊徐來客三數無顯者將夕食因辭而還璫盼始夜講講通
鑑初平起詩始開講舊牋猶多未備隨聽隨補之

十九日雪晨書左墓輒泐光滑氣觸則墨漫數拭數敗竟未得成朝食後至錫九家陪弔客寫主留待夕奠後設奠酌酒復留食乃還補關雎義牋

廿日雨晨起送錫九出殯則旣載矣更繞東行送至街口而還鈔書一葉補選唐絕句滋女始學鈔之補葛覃義牋林綬臣來

廿一日雨膠緜昨夜寒熱冷汗通宵不安早起已宴陳萬全陳葵心來鈔書一葉聞樾岑入省甚喜昨聞人言涂宗瀛撫湘未至時外有聯語云煙館愁倡伎愁左斗才更愁耕牛喜蝦蟆喜裴觀察亦喜涂公在湘行政用人盡見於此可謂談言微中主文譎諫也

廿二日陰雨雨珊來告別羅錫章來求差委鈔考工一葉錯謬重寫未成而罷課講如額湯丙璣來

廿三日陰雨將出送雨珊朝課未畢向午黼堂來久談健郎亦來言朱甯

甫病故以出題太不吉祥寶竹坡取蒲鞋女爲妻今又取江山女爲妾
遂至自劾清流笑話始此逸梧必大悅也樾岑繼至又談一時多言苗
疆事客去已暮急往姚立雲處赴飲則諸客先集況陶兩太守裘同知
俞鶴皋與我而五入席甚早食五肴先辭出至但少村處筠青樾昀亦
先在主人執禮甚恭待我而後送茶戍初入席二更後散談黎庶昌密
報倭謀足開邊釁及朱香孫鬼蜮之事余不置一辭筠青樾意各不同
大要以閩筠爲至厚而受害亦深令人知善不可爲之故然正足一笑
耳莊子之用大處濁世非莊不了夜還講書羅嬰去

廿四日晨大晴已而陰寒陳萬全來以失察高麗人撤差黎庶昌之害也
筠仙爲之求請五六次不能得可感余頑急起見之朝食後爲雨珊書
小條一張易郎來久談已而曾郎來遂至夜

廿五日雨彭子和後子來君豫來論注李頎詩欲并評話入注余曾有其

歌行評今殆忘之將夕劉總兵來言運儀在其家夜飯請過談攜紉昇
往過看子壽病已入上房其母守護之殆劇病也少談詣劉同席二秀
才一閒客一龍際雲皆不多談二更酒罷紉睡瀾漫而還璫亦假寐未
夜講

廿六日陰雨羅春山二子俱來求于樾岑鏡初運儀來遇俗客在坐殊未
盡言俗客亦未盡言唯增堅坐之勞耳遣約見郎來謀問舍求田之事
張東生來言恩科必有乙未科係正月廿四日下詔不必元旦制書也
余云考官望多開科爲喫飯計也秀才望開科頻數徒勞費無益何爲
乎鈔書一葉穀湖大伯之四孫介祺來見

廿七日陰晨出答訪樾岑出城尋易郎船不得至鏡初處久談過芝岑而
還朝食課讀未畢甚倦久眠比出已夕食矣介子又來作戴譜序鈔書

廿一葉夜講麟趾未明其意

廿八日陰曹竹蘇來午出訪黼堂葵心赴俞鶴皋家辭酒旋至傅家公餞
樾岑少村筠仙作陪已先至矣樾岑夕至坐談久之乃入坐筠仙言昏
禮記宗子無父母命之昏姻可自主因思公羊牋未補此義還家檢說
之方知說經易鹵莽如此一大段事初無理會也今日一集可謂不負
廿九日陰雨唐八牛君豫羅少純曾傳潛來詳問蜀事鈔經一葉

二月壬子朔晴鈔經一葉改定行露詩牋說以爲文王罔攸兼於庶獄之
事雖不知於經旨云何要爲有益治體運儀來辭行

二日癸丑復雨出送常霖生運儀便過曾蘭舟唯運儀處入談看次青全
集叔勤孫代鈞字沅帆來送叔子遺書久談而去在新化爲佼佼者紉

女留髻湯宅送報

三日晴燕孫周歲熊彭兩翁來熊八十三彭七十七合百六十也見郎重
伯來彭子了塵繼至遂盡一日窳女歸僅一見面鈔經二葉沈一復來

四日晴朝食後出答訪朶翁鄒生沅帆鄒出未晤至蓬海處小坐而還紉女熱發昏睡稍提抱之略理功課鈔經一葉已夕矣早眠未事惟講左傳懷嬴奉匱既而揮之重耳調之也怒曰云云懷嬴不自以爲子圉妻自稱秦女以詫於重耳也降服而囚降囚服以謝懷嬴媚秦之甚也此段媠瑣非史法史記往往學此爲句外句意外意之文文家之異於史家在此得宋生書

五日晴齋居樓上始定祭禮分四時祭四代以四仲月考定廿年乃始知人所謂明堂封禪茫昧不知者猶欺人語耳子雲來催萬譜序紉女麻疹熱愈甚已三日不食矣齋宿樓上不能攜嬰幼任其自眠起也

六日晴晨起饌具坐待羹飪至日隅中乃行禮祭

禩以仲章祔食三獻利成乃餽

七日晴今年始得步出朝食後從城西至南門將出省

墓以乘便不恭乃止還從城東投暮還得入談者唯重伯驗郎子久逸梧
笠僧五處耳非但素心不易脫略官派者卽不易使人慨然有張駱之
治不可復見之歎家中會女姻二黃家無人到夜講騶虞五紕縱文似
不順如師說甚癡亦不安也鈔考工一葉

八日晴始理學課午攜輿兒出南門省

墓天氣甚熱從瀏陽門入城經醴陵坡思老龍潭一帶近在咫尺而終古
不到想馬氏用兵時皆戰場也欲作一詩忽忽已到門人事紛紜不復
屬思矣得保之書將復之紉女熱未退索抱不得執筆夜乃怱怱作二
紙並寄彌之二紙

九日晴改作書箱所著書盈一篋所錄書將三篋矣故爲盛事始爲三弟
賃屋給其口食房嫗晨詬告半山令遣之大有難色且出怨言禁之不
止攜紉避樓上不覺盛怒旣而自笑何輕發於鼯鼠看船山悼亡詩又

不覺大笑彼何其不打自招也故知顰笑從容未易合法況云道乎子
壽香孫來夜談鈔記二葉

十日晴晨出答訪楊石泉便過禹翁還朝食蓬海來看雨珊題桃燕圖詞
及蓬所作雨珊故是行家鈔經三葉夜還寢紉女嘯呼婢嫗來叩門復
就側室領之

十一日晴鈔經二葉兼重寫唐絕句卷二葉朶園赴館筠仙招赴公社之
會過晡而往集者半散矣坐中唯有熊鶴翁左調元羅小元黃郎望之
殊不成集余頗發明聖道欲砭筠仙褊陋之敝彼驚怖吾言以爲河漢
也唯言世故則以爲然酉初飲於晴瀾舫籠鐙還熱始服薄繇

十二日晴鈔經三葉周官畢雖遲猶愈於無功者講詩以勸寡人恐非莊
姜莪云曲禮有自稱寡人乃與民言也書熟定勝學深鄭君殊有恐於
小兒女因改定之鈔詩二葉彭峻五及其從子芝弟來孫涵若及殷生

來心安禹門並來應接不暇晷乃理課又爲三弟移宅夜月甚明紉女
大愈始約與心安同船汎江爲沛南之游

十三日晴陰羅小雲來子玖來言昨講社發明論語聞政章之意夫子溫
良恭儉讓非美聖容亦非喜得政正言處世之法耳當時諸侯尙不及
今督撫得聞其政有何誇耀子禽故疑其求子貢明其得之之故不妨
不妨似求但異人求耳人求欲媚世子求不忤世如此乃於立言垂教
有益鈔詩三葉菟女生日放學作寒具姊弟爭食以致嫡庶起怨乾餽
以愆可歎乎午後小雨夜詣君豫談

十四日雨筠仙遣告朶翁欲開講宜約何人往聽余報以當從主人不可
代爲要客也久不講學招人必不至然正不妨招之不至在人過不在
我上說下教強聒不已亦今日之急務乎鈔詩六葉講凱風棘薪不知
棘今何木因思爾雅槐棘爲類桑柳爲類並不知桑柳何以爲類多所

不知殊深警悟

十五日晴鈔詩三葉午過思賢講舍會講者廿餘人亦頗整齊申散過羅夢子飲成贊君王君豫二羅先在多談曾重伯余言今人恥於服善有高才者衆所不能及則視其所善者而譏笑之云非某人不能制也如是以離兩家之交愈長一人之傲余今聞人言重伯唯服我則惕然不喜誠使能成其材而益其善雖自詘以推之亦何靳哉君豫似不喜但云時無仲尼而已酉正還月出正照門首春光甚麗登樓坐望尙寒不可久佇

十六日雨劉人俊來見以家忌辭之一梧再問月令爲繙漢書條示之鈔詩六葉申正設薦

先府君夜登樓講通鑑覺所載王莽事殊不足爲法戒徒文煩耳

十七日陰夜有雨無月今日春社桃花始開海棠未落城中春色殊少鈔

詩三葉出送劉馨翁龍濟生答訪劉君不遇作潘紱翁輓聯

紫薇仙吏最高年早

脩然富貴叢中閒話蓬萊水深淺黃閣回班
傳盛事更悵望昇平門下春風桃李夢低回

十八日晴復寒鈔詩六葉尹和伯朱香孫來夜講簡兮苦不貫串

十九日晴風涼鈔詩五葉恐春花已過攜諸兒女至城東探之遂至報慈

舊寓登鳳皇臺沿路楊花滿溝乃悟桑柳同條之義二樹皆有甚與葉
俱發也棘條則尙未悟今紫荆有莢如槐疑卽棘也荆與紫薇二種而
花略似故禁省或種紫荆取美名謂之紫薇槐棘之棘殆紫荆與若種
刺樹於庭以爲九卿之位甚無取也但不知古人何以不樹松柏女貞
不彫之樹而樹槐棘耳

廿日晨雨辰晴麻年姪陳葵心來重伯及羅郎來晚步過香孫看申報寶
廷取江山女爲妾自許直言可謂荒誕 朝廷卽行革職有以也昨遇
金剛兒顧瞻有威殊異凡兒其荒誕尤甚記此以驗其禍福鈔詩五葉